


十



歷代帝王宅京記卷十三

槐廬叢書

崑山顧炎武著

吳縣朱記榮校刊

建康

吳

吳志孫權傳曰建安十六年自吳徙治秣陵十七年城石頭改秣陵為建業

張紘傳曰紘建計宜出都秣陵權從之註引江表傳曰

楚武王所置名為金陵地勢岡阜連石頭訪問故老云

昔秦始皇東巡會稽經此縣望氣者云金陵地勢有王者都邑之氣故掘斷連岡改名秣陵舍處所俱存地有其氣天之所命宜為都邑權善其議未能從也後劉備

都之東宿秣陵周觀地形亦勸權

黃初二年自公安都鄂改名武昌

黃龍元年秋九月遷都建業因故府不改館

赤烏八年秋八月遣校尉陳勳將屯田及作士三萬人

鑿句容中道自小其至雲陽西城通會市作邸閣

十年春二月權適南宮三月改作太初宮諸人及州郡

將義作軍府寺耳材柱率細皆已腐朽常恐損壞今未

復而可徙武昌宮材瓦更繕治有司奏言曰武昌宮已

卑宮室為美今軍事未已所在通更伐致權曰大禹以

桑徙武昌材瓦自可用也所在多賦若更通伐妨損農

有神龍殿去縣三里左太沖吳都賦云抗

神龍之華殿是也赤烏殿在縣東北五里

十一年春三月宮成

孫亮傳曰五鳳二年冬十二月作太廟

孫皓傳曰甘露元年秋九月從西陵督步闡表徙都武

昌

寶鼎元年冬十二月還都建業二年夏六月起顯明宮

冬十二月皓移居之太康地記曰吳有太初宮方三百

丈權所起也昭明宮方五百丈皓

所徙也避晉諱故曰顯明吳麻云顯明在太初之東

江表傳曰皓營新宮二千石以下皆自入山督攝伐

木又破壞諸營大開園囿起土山樓觀窮極

伎巧工役之費以億萬計陸凱固諫不從

陸凱傳上疏言武昌土地實危險而脊确非王都安國

養民之處船舶則沉漂陵居則峻危且童謠言甯飲建

業水不食武昌魚甯還建業死不止武昌居臣聞翼星

為變熒惑作妖童謠之言生於天心乃以安居而比死

足明天意知民所苦也

宋書禮志曰孫權始都武昌及建業不立郊兆至末年

朱氏槐廬校刊

太元元年十一月祭南郊其地今秣陵縣南十餘里郊中是也

又曰孫權於建業立兄長沙桓王策廟於朱爵橋南子亮代立明年正月於宮東立權廟曰太祖廟孫皓追尊父和曰文皇帝寶鼎二年立廟京邑號曰清廟

晉

晉書元帝本紀曰建武元年春三月立宗廟社稷於建康

冬十一月丁卯立太學

太興元年冬十一月新作聽訟觀

禮志曰太興二年立南郊於己地

成帝本紀曰咸和四年春正月蘇碩攻臺城焚太極東堂秘閣皆盡二月以建平園爲宮
五年秋九月造新宮始繕苑城

世說曰桓宣武移鎮南州制街衢平直人謂王東亭丞相初營建康無所因承而制置紆曲方此爲劣東亭曰此丞相乃所以爲巧江左地促不如中國若使阡陌條暢則一覽而盡故紆餘委曲若不可測

七年冬十二月庚戌帝遷於新宮

八年春正月辛亥朔詔曰昔大賊縱暴宮室焚蕩元惡雖翦未暇營築有司屢陳朝會逼狹遂作斯宮子來之勞不日而成旣獲臨御大饗羣后九賓充庭百官象物

知君子勤禮小人盡力矣思蠲密網咸同斯會其赦五
歲刑以下

禮志曰咸和八年正月於覆舟山南北郊

又曰咸和中詔內外諸軍戲兵於南郊之場故其地因
名鬪場

宋書禮志曰明帝大甯三年七月始詔立北郊未及建
而帝崩故成帝咸和八年正月追述前旨於覆舟山南
立之

本紀又曰咸康二年冬十月新作朱雀浮桁

三年春正月辛卯立太學

宋書禮志曰孝武時以太學
在水南縣遠有司議依升平

元年於中堂
權立行太學

禮志曰海西公於鍾山立流杯曲水延百僚

孝武帝本紀曰太元三年春二月乙巳作新宮帝移居
會稽王邸秋七月辛巳帝入新宮

王彪之傳曰彪之與謝安共掌朝政安欲更營宮室彪
之曰中興初卽位東府殊爲儉陋元明二帝亦不改制
蘇峻之亂成帝止蘭臺都坐殆不蔽寒暑是以更營修
築方之漢魏誠爲儉狹復不至陋殆合豐約之中今自
可隨宜增益脩補而已疆寇未殄正是休兵養士之時
何可大興功力勞擾百姓安曰宮室不壯後世謂人無
能彪之曰在天下事當保國甯家朝政未允豈以脩屋
宇爲能耶安無以奪故終彪之之世不改營焉

彪之以
太元二

年十月卒

謝安傳曰是時宮室毀壞安欲繕之尙書令王彪之等以外寇爲諫安不從竟獨決之宮室用成皆仰模元象合體辰極而役無勞之疑之

徐廣晉紀曰孝武甯康二年尙書令王彪之等欲改作

新宮太元三年二月內外軍六千人始營築至七月而

成太極殿高八丈長二十七丈廣十丈尙書謝萬監視

賜爵關內侯大匠毛安之關中侯此言殿作新宮出於彪之似未審

宋明帝文章志曰太元中新宮成議者欲屈王獻之題

榜以爲萬代寶謝安與王語次因及魏時起凌雲閣忘

題榜乃使韋仲將懸梯上題之欲以此風動其意王解

其旨正色曰此奇事者仲將魏朝大臣甯可使其若此有以知其德之不長安知其心乃不復逼之

本紀又曰六年春正月帝初奉佛法立精舍於殿內引諸沙門以居之

十六年春正月庚申改築太廟秋九月新廟成

禮志曰太廟殿正室十四間東西儲各一間合十六間

棟高八丈四尺

本紀又曰十七年秋八月新作東宮

二六年春正月造清暑殿

夏四月新作永安宮

二十一年秋九月庚申帝崩於清暑殿帝爲清暑殿有

識者以爲清暑反爲楚聲哀楚之徵也俄而帝崩
王雅傳曰帝起清暑殿於後宮開北上閣出華林園與
美人張氏同遊止惟雅與焉

宋書五行志曰晉孝武太元中立殿內名曰清暑少時
而崩時人曰清暑者反言楚聲也果有哀楚之聲有人
曰非此之謂也讖云代晉者楚及桓元篡逆自號曰楚
桓元傳曰將脩殿宇乃移入東宮又開東掖平昌廣莫
及宮殿諸門皆爲三道

宋書禮志曰晉氏南遷立南郊於已地

安帝本紀曰義熙十年城東府

宋書武帝本紀亦曰義熙十年築東府起府舍

宋

南史宋文帝本紀曰元嘉十五年秋七月新作東宮

宋書文帝本紀曰元嘉二十五年春正月於臺東西開

萬春千秋二門

又曰元嘉二十年度宮之辰地八里之外整制千畝開

阡陌立先農壇於中阡西陌南御耕壇於中阡東陌北

又曰元嘉二十年復立國子學二十七年廢

又曰禮左宗廟右社稷歷代尊之故洛京社稷在廟之

右而江左又然也吳時宮東門雩門疑吳社亦在東宮

與廟同所也宋仍舊無所改作

二十三年築北堤立元武湖於樂遊苑北築景陽山於

華林園

何尚之傳日上欲於湖中立方丈蓬萊瀛洲三神山尚之固諫乃止

二十五年夏四月乙巳新作閭闔廣莫二門改先廣莫門曰承明開陽門曰津陽

孝武帝本紀曰孝建元年春正月起正光殿

大明三年秋九月壬辰於元武湖北立上林苑

禮志曰孝武大明三年九月尚書左丞徐爰議郊祀之

位遠古蔑聞禮記燔柴於泰壇祭天也兆於南郊就陽

位也漢初甘泉河東禋埋易位終亦徙於長安南北光

武紹祚定二郊雒陽南北晉氏過江悉在北及郊兆之

議紛然不一又南出道狹未議開闡遂於東南已地創

立丘壇皇宋受命因而弗改且居民之中非邑外之謂

今聖圖重造舊章畢新南驛開塗陽路修遠謂宜移郊

正午以定天位博士司馬興之傳郁太常丞陸澄並同

爰議乃移郊兆於秣陵牛頭山西正在宮之午地世祖

崩前廢帝即位以郊舊地為吉祥移還本處

又曰北郊晉成帝世始立本在覆舟山南宋太祖以其

地為樂遊苑移於山西北後以其地為北河移於湖塘

西北其地卑下泥濕又移於白石邨東其地又以為湖

乃移於鍾山北京道西與南郊相對後罷白石東湖北

郊還舊處

又曰大明三年冬十一月甲子立皇后蠶宮於西郊

隋書禮儀志曰宋孝武大明四年始於臺城西白石里

為先蠶設兆域置大殿七間又立蠶觀

南史宋孝武帝紀曰大明五年夏五月起明堂於國學南丙巳之地

五年秋閏九月丙申初立馳道自閭闔門至於朱雀門又自承明門至於元武門

六年夏四月庚申新作大航門

五月丙戌置凌室於覆舟山脩藏冰之禮

七年冬十二月巳未於博望梁山立雙闕

武帝本紀曰孝武大明中壞上所居陰室於其處起玉燭殿與羣臣觀之牀頭有土鄣壁上葛燈籠麻繩拂侍中袁顛盛稱上儉素之德孝武不答獨曰田舍公得此已為過矣

前廢帝本紀曰大明八年秋七月乙卯罷南北二馳道

景和元年秋八月庚辰以石頭城為長樂宮東府城為

未央宮甲申以北邸為建章宮南第長楊宮

己丑復立南北二馳道

良吏傳曰晉世諸帝多處內房朝宴所臨東西二堂而已孝武末年清暑方構高祖受命無所改作所居唯稱西殿不制嘉名太祖因之亦有合殿之稱及世祖承統制度奢廣犬馬餘菽粟土木衣綿繡追陋前規更造正光玉燭紫極諸殿雕欒綺節珠窗網戶嬖女幸臣賜傾府藏

齊

南齊書高帝本紀曰建元二年夏五月立六門都墻
王儉傳曰上壞宋明帝紫極殿以材柱起宣陽門儉與
褚淵及叔父僧虔連名上表諫上手詔酬納
宋世外六門設竹籬是年初有發白虎樽者言白門三
重門竹籬穿不完上感其言改立都牆儉又諫上答曰
吾欲令後世無以加也

王儉集有諫壞宋明帝紫極殿以材柱起宣陽門表其
文曰臣聞德者身之基儉者身之興春臺將立晉卿秉
議北宮肇構漢臣盡規彼二君者或列國常侯或守文
中主尙使諫諍在義卽悅陛下聖哲應期臣等職司隆
重敢藉前誥竊乃有心陛下登庸幸物節省之數既昭

龍衮璇極簡約之訓彌遠乾華外構采椽不斲紫極故
材爲宣陽殿臣等未譬也夫移心疾於股肱非良醫之
美畏影迹而馳驚豈靜處之方且又三農在日十畛咸
事輟望歲之勤興土木之役非所以宣昭大獻光示遐
邇若以門居宮南重陽所屬年月稍久漸就淪胥自可
隨宜修理而合度改作之煩於是乎息所啟謬合付外施行

武帝本紀曰永明元年春正月甲子築青溪舊宮

梁書阮孝緒傳建武末青溪宮東門無故自崩大風拔
東宮門外楊樹或以問孝緒曰青溪皇家舊宅齊爲木
行東者木位今東門自壞其衰矣

南史齊和帝紀永明中望氣者云新林婁湖青溪竝有天子氣於其處大起樓苑宮觀武帝屢遊幸以應之又起舊宮於青溪以弭其氣而明帝舊居東府城西延興末明帝龍飛至是梁武帝眾軍城於新林而武帝舊宅亦在征虜

二年秋七月癸未詔曰夫樂所自生先哲垂誥禮不忘本積代同風是以漢光遲回於南陽魏文殷勤於譙國清宮體天含暉則地栖寶光定靈源允集符名在昔期運初開經綸方遠繕築之旁我則未暇時流事往永惟哽咽朕以寡薄嗣奉鴻基思存締構式表王迹考星創制揆日興功子來告畢規摹昭備宜申豐落之禮以暢

感慰之懷可克日小會八月丙午車駕幸舊宮小會設

金石樂

梁書南平王偉傳齊世青溪宮改為芳林苑天監初賜偉為第偉又加穿築增植嘉樹珍果窮極雕麗每與賓客遊其中命從事中郎蕭子範為記之

王儉傳曰永明三年省總明觀於儉宅開學士館

南齊書王

儉傳宋末領東觀祭酒即明帝所置總明觀也

本紀又曰五年秋九月辛卯車駕幸商飈館上所立在孫陵岡世呼為九日臺者也

冬十月初起新林苑

十一年秋七月上大漸詔曰內殿鳳華壽昌耀靈三處是吾所治製夫貴有天下富兼四海宴處寢息不容乃陋謂此為奢儉之中慎勿壞云

鬱林王本紀曰毀世祖招婉殿乞閹人徐龍駒爲齋
明帝本紀曰建武元年冬十一月詔省新林苑先是民
地悉以還主原責本直

二年冬十月丁卯詔曰軌世去奢事殷哲后訓物以儉
理鏡前王朕屬流弊之末襲澆浮之季雖恭已宏化刻
意隆平而禮讓未興侈華猶競永覽元風兢言集愧思
所以還淳改俗反古移民可罷東田毀興光樓

本紀又曰廢文帝所起太子東田斥賣之蓋文惠太子
所起

又曰帝潛信道術巫覡云後湖水頭經過宮內致帝有
疾帝乃自至大官行水溝左右啟大官若無此則不立

帝決意塞之欲南引淮流會崩事寢

東昏侯本紀曰後宮遭火之後更起仙華神仙玉壽諸
殿刻畫雕綵青葢金口帶麝香塗壁錦幔朱簾窮極綺
麗繫役工匠自夜達曉猶不副速乃別取諸寺佛刹殿
藻井仙人騎獸以充足之世祖興光樓上施青漆世謂
之青樓帝曰武帝不巧何不純用琉璃

三年夏於閱武堂起芳樂苑山石皆塗以五采跨池水
立紫閣諸樓觀壁上畫男女私褻之像種好樹美竹天
時盛暑未及經日便就萎枯於是徵求民家望樹便取
毀撤牆屋以移致之朝裁暮拔道路相繼花藥雜草亦
復皆然

梁

梁書武帝本紀曰天監元年冬十一月己未立小廟

四年春二月立建興苑於秣陵建興里

五年秋八月辛酉作太子宮

六年秋八月京師大水因濤入加御道七尺

九年丁亥改闕武堂為德陽堂聽訟堂為儀賢堂

七年春正月戊戌作神龍仁虎闕於端門大司馬門外

二月乙卯新作國門於越城南

九年春正月庚寅新作緣淮塘北岸起石頭迄東冶南

岸起後諸離門迄三橋

士年春三月丁巳築西靜壇於鍾山

十二年春二月辛巳新作太極殿改為十三間南史曰

數江海銅鐘讚序曰今太極殿前兩大銅鐘周景王鑄也

夏六月癸巳新作太廟增基九尺庚子太極殿成

冬十月丁亥詔曰明堂地勢卑濕未稱乃心外可量就

埤起以盡誠敬

普通二年夏四月乙卯改作南北郊

丙辰詔曰夫欽若昊天麻象無違躬執耒耜盡力致敬

上協星鳥俯順民時平秩東作義不在南前代因襲有

乖禮制可於震方簡求沃野具茲千畝庶允舊章

三年秋八月辛酉作二郊及籍田並畢

魏書蕭衍傳曰崇信佛道於建業起同泰寺又於故宅

立光宅寺於鍾山立大愛敬寺兼營長干二寺皆窮工極巧殫竭財力百姓苦之

大同八年十二月丙辰於宮城西立士林館冬延集學者增廣生員立五館置五經博士天監初則何佟之賀瑒嚴植之明山賓等覆述制旨并撰吉凶軍賓嘉五禮凡一千餘卷高祖稱制斷疑大同中於臺西立士林館領軍朱异太府卿賀琛舍人孔子祛等遞相講述皇太子宣城王亦於東宮宣獻堂及揚州廡開講於是四方郡國趨學向風雲集於京師矣兼篤信正法尤長釋典聽覽餘閒卽於重雲殿及同泰寺講說名僧碩學四部聽衆常萬餘人

太清元年秋九月癸卯王遊苑成

昭明太子傳曰性愛山水於元圃穿築更立亭館與朝士名素著者游其中嘗泛舟後池番禺侯軌盛稱此中宜奏女樂太子不答詠左思招隱詩曰何必絲與竹山水有清音侯慙而止

敬帝本紀曰太平元年冬十一月乙卯起雲龍神虎門元帝本紀曰承聖元年冬十一月丙子卽皇帝位於江陵

二年秋八月庚子詔曰夫爰始居毫不廢先王之都受命於周無改舊邦之頌頃戎旃旣息關柝無驚去魯興嘆有感宵分過沛隕涕寔勞夕寐仍以瀟湘作亂庸蜀

阻兵命將授律指期克定今八表乂清四郊無壘宜從
青蓋之典言歸白水之鄉江湘委輸方船連舳巴峽舟
艦精甲百萬先次建業行實京師然後六軍邁征九旂
揚旆拜謁瑩陵修復宗社主者詳依舊典以時宣勒
後周書王褒傳曰元帝以建業彫殘方須修復江陵殷
盛便欲安之又其故府臣僚皆楚人也竝願卽都荆郢
嘗召羣臣議之領軍將軍胡僧祐吏部尙書宗慄太府
卿黃羅漢御史中丞劉毅等曰建業雖是舊都王氣已
盡且與北寇鄰接止隔一江若有不虞悔無所及臣等
嘗聞荆南之地有天子氣今陛下龍飛纂業其應斯乎
天時人事徵祥如此臣等所見遷徙非宜帝以爲然乃謂

褒等曰卿意以爲何如褒性謹慎知帝多猜忌弗敢公
言其非唯唯而已後因清閒密諫言辭甚切帝頗納之
然意好荆楚已從僧祐等策明日乃於衆中謂褒曰卿
昨日勸還建業不爲無理褒以宣室之言豈宜顯之於
衆知其計之不用也於是不復言及魏兵至江陵帝出
降

陳

陳書高祖本紀曰永定元年秋七月起太極殿初侯景
之平也火焚太極殿承聖中議欲營之獨闕一柱至是
有樟木大十八圍長四丈五尺流泊陶家後渚監軍鄒
子度以聞詔中書令沈衆兼起部尙書少府卿蔡濤兼

將作大匠起太極殿冬十月甲寅成十二月丙寅帝於太極殿東堂宴羣臣設金石之樂

梁書王僧辯傳僧辯入據臺城其夜軍人採柘失火燒太極殿及東西堂等

世祖本紀曰天嘉五年秋九月城西城

六年秋九月新作大航

隋書五行志曰陳天嘉中盛修宮室起顯德等五殿稱為壯麗

陳書宣帝本紀曰太建四年冬十二月丁卯詔曰梁氏之季兵火薦臻承華焚蕩頓無遺構寶命維新迄將二紀頻事戎旃未遑脩繕今工役差閒椽楹有擬來歲開

肇創築東宮可權置起部尙書將作大匠用主監作

五年夏六月治明堂

七年夏六月己卯改作雲龍神虎門

秋九月丁未於樂遊苑龍舟山立甘露亭

九年冬十二月戊申東宮成

廢帝紀曰自梁室亂離東宮焚燼太子居於永福省

十年秋九月乙巳立方明堂於婁湖甲寅輿駕幸婁湖

臨誓

后妃傳論曰後主初即位以始興王叔陵之亂被傷卧

於承香閣下時諸姬竝不得進唯張貴妃侍焉而柳太

后猶居柏梁殿即皇后之正殿也後主沈皇后素無寵

不得侍疾別居求賢殿至德二年乃於光熙殿前起臨

春結綺望仙三閣閣高數丈竝數千間其牕牖壁帶懸
楣欄檻之類竝以沈檀香木為之又飾金玉閒以珠翠
外施珠簾內有寶牀寶帳其服玩之屬瑰奇珍麗近古
所未有每微風暫至香聞數里朝日初照光映後庭其
下積石為山引水為池植以奇樹雜以花藥後主自居
臨春閣張貴妃居結綺閣龔孔二貴嬪居望仙閣竝複
道交相往來後主末年起齊雲觀國人歌
之日齊雲觀寇來無際畔

南唐

南唐書烈祖紀曰天祐十一年始城昇州

十四年夏五月城成

昇元元年冬十月丙申以建康為西都

二年冬十月丙子立太學

三年春三月甲午作南郊行宮千間

夏四月作北郊於元武湖西

四年冬十一月庚辰改西都崇英殿為延英殿凝華內

殿前為昇元殿後為雍和殿興祥殿為照德殿積慶殿

為穆清殿

帝性節儉建國始即金陵治所為宮唯加鳴尾設欄檻
而已終不故作

周宗傳曰烈祖鎮金陵用宋齊邱議迎吳讓皇都金陵
繕府治為宮徙都統府於古臺城都統府成凡二千四
百間環一千五百步

百壬申正月初六日依舊鈔本校

蘇州崇真宮舊址在蘇州府城內...

魏宗魯曰庶庶金與用宋齊...

補西祭不如...

帝對酒翫戲圖...

無...

...

...

...

...

光緒歲在著雍困敦春月吳縣朱記榮槐廬家塾校刊

歷代帝王宅京記卷十五終

歷代帝王宅京記卷十四

槐廬叢書

崑山顧炎武著

吳縣朱記榮校刊

雲中

後魏

魏書太祖本紀曰登國六年起河南宮天興元年冬十

月起天文殿

二年春二月以所獲高車衆起鹿苑於南臺陰北距長

城東包白登屬之西山廣輪數十里鑿渠引五川水注

之苑中疏爲三溝分流宮城內外又穿鴻雁池 秋七

月起天華殿

八月增啟京師十二門作西武庫

冬十月太廟成 十二月天華殿成

三年春三月穿城南渠通於城內作東西魚池

秋七月起中天殿及雲母堂金華室

四年夏六月起紫極殿元武樓涼風觀石池鹿苑臺

六年冬十月起西昭陽殿

天賜元年冬十月築西宮

三年夏六月發八部五百里內男丁築灑南宮門闕高

十餘丈引溝穿池廣苑圍規立外城方二十里分置市

里經塗洞達三十日罷

四年秋七月築北宮垣三十日罷

莫題傳曰道武欲廣宮室規度平城四方數十里將模

鄴雒長安之制運材數百萬根以題機巧徵令監之

太宗本紀曰永興元年春二月癸丑穿魚池於北苑

神瑞元年春二月乙卯起豐宮於平城東北

二年春二月甲辰立大祖廟於白登之西

泰常元年冬十一月戊寅起蓬臺於北苑

二年秋七月乙酉起白臺於城南高二十丈

三年冬十月戊辰築宮於西苑

四年春三月癸丑築宮於蓬臺北 秋九月築宮於白

登山

五年夏四月丙寅起灑南宮

六年春三月發京師六千餘人築苑起自舊苑東包白

登周迴四十餘里

七年秋九月辛亥築平城外郭周迴三十二里

八年冬十月癸卯廣西宮起外垣墻周迴二十里

世祖本紀曰始廣二年春三月庚申營故東宮為萬壽

宮起永安安樂二殿臨望觀九華堂秋九月永安安樂

二殿成

三年春三月起太學於城東

神嘉四年秋七月起承華宮

延和元年秋七月築東宮

三年秋七月辛巳東宮成備置屯衛三分西宮之一

太平真君十一年春二月大脩宮室皇太后居於北宮

高宗本紀曰興安二年春二月乙丑發京師五千人穿

天淵池后妃傳曰文成初穿天淵地獲一銘石稱桓帝

葬母氏遠近赴會二十餘萬有司以聞命藏之

廟秋七月築馬射臺於南郊

太安四年春三月丙辰起太華殿秋九月辛亥成

顯祖本紀曰皇興五年秋八月丙午傳位於太子帝稱

太上皇帝已酉徙御崇光采椽不斲土堦而已

公孫叡傳曰顯祖於苑內立殿勅中秘羣宮制名叡曰

臣聞至尊至貴莫崇於帝王天人挹損莫大於謙光伏

惟陛下躬唐虞之德存道顯神逍遙物外宮居之名當

協睿旨臣愚以為宜曰崇先奏可

高帝本紀曰延興三年春正月丁亥改崇光宮為甯先宮

承明元年冬十月丁巳起七寶永安行殿

太和元年春正月辛亥起太和安昌二殿

李冲傳詔曰昔軒皇誕御垂棟宇之構爰歷三代興宮

觀之式然茅茨土階昭德于上代層臺廣廈崇威於中

葉良由文質異宜華樸殊禮故也是以周成繼業營明

堂於東都漢祖聿興建未央於咸鎬蓋所以尊嚴皇威

崇重帝德豈好奢惡儉苟敝民力者哉國家皇運統天

協纂乾庥銳意四方靡遑建制宮室之度頗為未允太

祖初基雖粗有經式自茲厥後復多營改至於三元慶

亮穆

饗萬國充延觀光之使具瞻有闕朕以寡德猥承鴻緒

運屬休期事鍾昌運宜遵遠度式茲宮宇指訓規模事

昭於平日明堂太廟已成於昔年又因往歲之豐資藉

民情之安逸將以今春營改正殿違犯時令行之惕然

但朔土多寒事殊南夏自非裁度當春興役徂暑則廣

制崇臺莫由克就成功立事非委賢不可改制規模非

任能莫濟尚書冲器懷淵博經度明遠可領將作大匠

司空長樂公穆亮可與大匠共監興繕其去故從新之

宜脩復太極之制朕當別加指授

本紀又曰秋七月己酉二殿成起朱明思賢門

九月庚子起永樂遊觀殿於北苑穿神淵池

三年春正月癸丑坤德六合殿成三月壬寅乾象六合

殿成又曰坤德六合殿

夏六月辛未起文石室靈泉殿於方山

四年春正月癸卯乾象六合殿成南監本亦作六合疑誤

秋七月壬子改作東明觀成秋七月壬子改作東明觀成

五年夏四月己亥行幸方山建永固石室於山上立碑

於石室之庭又起鑿元殿

后妃傳曰馮太后與孝文遊於方山顧川阜有終焉之

志因謂羣臣曰舜葬蒼梧二妃不從豈得遠耐山陵然

後為貴哉吾百歲後神其安此孝文乃詔有司營建壽

陵於方山又起永固石室將終為清廟焉太和元年起

作八年而成刊石立碑頌太后功德

七年冬十月戊午皇信堂成

九年秋七月丙寅朔新作諸門

十年秋九月辛卯朔詔起明堂辟雍

十二年秋九月丁酉起宣文堂經武殿

閏九月甲子築圓邱於南郊

十五年夏四月己卯經始明堂改太廟冬十月明堂太

廟成十一月丁卯遷七廟神主於新廟十二月壬辰遷

社於內城之西

蔣少游傳於平城將營太廟太極殿遣少游乘傳詣洛

量準魏晉基趾

蔣少游條在此下

十六年春二月戊子帝移御永樂宮庚寅壞太華殿經始太極殿冬十月庚戌成原太極殿穆亮傳曰時將建太極殿引見羣臣於太華殿高祖曰朕仰遵先意將營殿宇役夫既至興工有日今欲徙居永樂以避囂埃土木雖復無心毀之能不悽愴今故臨對卿等與之取別此殿乃高宗所制爰歷顯祖逮朕冲年卽位於此但事來奪情將有改制仰惟疇昔惟深悲感亮稽首對曰臣聞稽之卜筮載自典經占以決疑古今攸尙興建之功事在不易願陛下訖之著龜以定可否又去歲役作爲功甚多太廟明堂一年便就若仍歲頻興恐民力凋敝况材幹新伐爲功不固願待逾年小

康百姓高祖曰若終不爲何如卿言後必爲之逾年何益朕遠覽前王無不興造故有周創業經建靈臺洪漢受終未央是作草創之初猶尙若此况朕承累聖之運屬太平之基且今八表清晏年穀又登爰及此時以就大功人生定分脩短命也著蔡雖智其如命何當委之大分豈假卜筮遂移御永樂宮本紀又曰十一月乙卯依古六寢權制三室以安昌殿爲內寢皇信堂爲中寢四合殿爲外寢

十七年春三月戊辰改作後宮幸永興園徙御宣文室南齊書魏虜傳曰什翼珪道武帝始都平城猶逐水草無城郭木末明元帝始土著居處佛狸太武帝破梁州黃龍徙

其居民大築郭邑截平城西爲宮城四角起樓女墻門不施屋城又無塹南門外立二土門內立廟開四門各隨方色凡五廟一世一間瓦屋其西立太社佛狸所居雲母等三殿又立重屋居其上飲食廚名阿眞廚在西皇后可孫恒出此廚求食殿西鎧仗庫屋四十餘間殿北絲綿布絹庫土屋一十餘間太子宮在城東亦開四門瓦屋四角起樓妃妾住皆土屋婢使千餘人織綾錦販賣酤酒養猪羊牧牛馬種菜逐利太官八十餘窖窖四千斛半穀半米又有懸食瓦屋數間置尙方作鐵及木其袍衣使宮內婢爲之太子別有倉庫其郭城繞宮城南悉築爲坊坊開巷坊大者容四五百家小者容六

七十家每南坊搜檢以備姦巧城西南去白登山七里於山邊別立父祖廟城西有祠天壇立四十九木人皆長丈許白幘練裙馬尾被立壇上常以四月四日殺牛馬祭祀盛陳鹵簿邊壇奔馳奏伎爲樂城西三里刻石寫五經及其國記於鄴取石虎文石屋基六十枚皆長丈餘以充用自佛狸至萬民獻文世增雕飾正殿西築土臺謂之白樓萬民禪位後常游觀其上臺南又有祠星樓正殿西又有祠屋琉璃爲瓦宮門稍覆以屋猶不知爲重樓並設削泥采畫金剛力士胡俗尙術又規畫黑龍相盤繞以爲壓勝

水經注曰羊水又東注於如渾水亂流逕方嶺上有文

明太皇太后陵陵之東北有高祖陵二陵之南有永固
堂堂之四周隅雉列樹階欄檻及扉戶梁壁椽瓦悉文
石也檐前四柱採洛陽之八風谷黑石爲之雕鏤隱起
以金銀間雲雉有若錦焉堂之內外四側結兩石扶疑
跌疑張疑作疑青石屏風以文石爲椽竝隱起忠孝之容題
刻貞順之名廟前鑄石爲碑獸碑石至佳左右列柏四
周迷禽閣日院外西側有思遠靈圖圖內有齋堂南門
表二石闕闕下斬山累結御路下望靈泉宮池皓若圓
鏡矣

如渾水又南分爲二水一水西出南屈入北苑中歷諸
池沿又南逕虎圈東魏太平眞君五年成之以牢虎也

季秋之月聖上親御圈上勅虎士效力於其下事同奔

戎生制猛獸

朱謀瑋曰穆天子傳云有虎在平葭中即
七萃之士高奔戎請生捕虎必全之

詩所謂袒裼暴虎獻於公所也故魏有捍虎圖也

又逕平城西郭內魏泰常七年所成也城周下有西郭

外有郊天壇壇之東側有郊天碑建興四年立

其水南又屈逕平城縣故城南史記曰高帝先至平城

史記音義曰在雁門卽此縣矣王莽之平順也魏天興

二年遷都於此太和十六年破太華安昌諸殿造太極

殿東西堂及朝堂夾建象魏乾元中陽端門東西二掖

門雲龍神虎中華諸門皆飾以觀閣東堂東接太和殿

殿之東階下有一碑太和中立石是洛陽八風谷之石

繙也殿之東北接紫宮寺南對承賢門門南即皇信堂
堂之四周圖古聖忠臣烈士之容刊題其側是辯章郎
彭城張僧達樂安蔣少游於下有堂南對白臺臺甚高
廣臺基四周列壁閣路自內而升國之圖錄秘籍悉積
其下臺西即朱明閣直侍之官出入所由其水夾御路
南流逕蓬臺西魏神瑞三年又毀建白樓樓甚高竦加
觀榭於其上表裏飾以石粉皜曜建素赭白綺分故世
謂之白樓也後置大鼓於其上晨昏伐以干椎為城里
諸門啟閉之候謂之戒晨鼓也

又南逕皇舅寺西是太師昌黎馮晉國所造朱謀埠曰
字晉國文明太后兄也官定州刺史進爵昌黎王在諸
州鎮建佛圖精舍合七十二處孝文即位為侍中太師

有五層浮圖其神圖像皆合青石為之加以金銀火齊
眾綵之上煒煒有精光又南逕永甯七級浮圖其制甚
妙工在寡雙又南遠出郊郭弱柳蔭街綠楊被浦公私
引裂用周圍挽宋本作長塘曲池所在布濩故不可得
而論也

一水南逕白登山西服虔曰白登臺名也去平城七里
如淳曰平城旁之高城若邱陵矣今平城東十七里有
臺即白登臺也臺南對岡阜即白登山也故漢書稱上
遂至平城上白登者也為匈奴所圍處孫暢之述畫曰
漢高祖被圍七日陳平使能畫作美女送與冒頓闕氏
恐冒頓勝漢其寵必衰說冒頓解圍於此矣

其水又逕甯先宮東獻文帝之為太上皇也所居故宮
矣宮之東次下有兩石柱是石虎鄴城東門石橋柱也
按柱勒趙建武中造以其石作工妙徙之於此余為尙
書祠部與宜都王穆巖同拜北郊親所經見柱側悉鏤
雲烟朱謀埠曰當作雲烟上作蟠螭甚有形勢信為工妙去子丹
碑則遠矣

其水又南逕平城縣故城東司州代尹治皇都洛陽以

為恒州水左有大道壇廟始光二年少室道士寇謙之

所建也兼諸嶽廟碑亦多所署立其廟階五成宋本作三成

四周欄檻上階之上以木為圓基令于相枝梧以板切

宋本作砌其上欄陛承阿上圓制如明堂而專室四戶室內

有神坐坐右列玉磬皇輿親降受錄靈壇號曰天師宣

揚道式暫重當時壇之東北舊有靜輪宮魏神鼎四年

造抑亦柏梁之流也臺高廣超出雲間欲令上延霄客

下絕囂浮太平真君十一年又毀之物不停固白登亦

繼禡矣水石有三層浮圖真容鷲架悉結石也裝制麗

質亦盡美善也東郭外太和中閩人宕昌公鉗耳處時

立祗洹舍於東皋椽瓦梁棟臺壁櫺陛尊容聖像及牀

坐軒帳悉青石也圖制可觀所恨惟列壁合石疎而不

密庭中有祗洹碑題大篆非佳耳然京邑帝里佛法豐

盛神圖妙塔桀時相望法輪東轉茲為上矣

其水自北苑南出歷京城內河千兩湄太和十年累石

其水自北苑南出歷京城內河千兩湄太和十年累石

結岸夾塘之上雜樹交蔭郭南結兩石橋橫水為梁又南逕籍田及藥圃西明堂東明堂上圓下方四周十二戶九堂而不為重隅也室外柱內綺井之下施機輪飾縹朱謀埠曰當作畫像天牀畫北道之宿烏辰列宿象蓋天也每月隨斗所建之辰轉應天道此之異古也加靈臺於其上下則引水為辟雍水側結石為塘事準古制是太和中之所經建也

地理志曰西京大同府陶唐冀州之城虞分并州夏復屬冀州周職方正北曰并州戰國趙武靈王始置雲中郡秦當作漢屬代王國為平城縣魏為新興郡晉仍屬雁門劉琨表封猗盧為代王都平城遼史興宗紀曰重熙

十三年十一月丁卯改雲州為西京元魏道武於此遂建都邑孝文帝改為司州牧置代尹遷都洛邑改萬年又置恒州高齊文宣帝廢州為恒安鎮今謂之東城尋復恒州周復為恒安鎮改朔州隋仍為鎮唐武德四年置北恒州七年廢貞觀十四年移雲中定襄縣於此永淳元年默啜為邊患移民朔州開元十八年置雲中州天寶元年改雲中郡乾元元年曰雲州乾符三年大同軍節度使李國昌之克用為雲中守捉使殺防禦使據州以聞僖宗赦克用以國昌為大同軍防禦使不受命廣明元年李琢攻國昌國昌兵敗與克用俱奔北地黃巢入京師詔發代北軍尋赦國昌使討賊克用率三萬

五千騎而南收京師功第一國昌封隴西郡王克用子
存勛滅梁是爲唐莊宗同光三年復以雲州爲大同軍
節度使晉高祖代唐以契丹有援立功割山前代北地
爲賂大同來屬因連西京下云重熙十二年升爲西京
此卽云建西京史文之
誤敵樓棚櫓具廣袤二十里門東曰迎春南曰朝陽西
曰定西北曰拱極元魏宮垣占城之北面雙闕尙在遼
旣建都用爲重地非親王不得主之清甯八年建華嚴
寺奉安諸帝石像銅像又有天王寺留守司衛南曰西
省北門之東曰大同府北門之西曰大同驛初爲大同
軍節度重熙十三年升爲西京府曰大同

金史地理志曰大同府遼爲西京金因之大定五年建

宮室名其殿曰保安其門南曰奉天東曰宣仁西曰阜
成天會三年建太祖原廟置留
守司

壬申正月初六日校舊鈔本 沅叔

光緒歲在著雍困敦春月吳縣朱記榮槐廬家塾校刊
歷代帝王宅京記卷十四終

歷代帝王宅京記卷十五

槐廬叢書

晉書崑山顧炎武著

吳縣朱記榮校刊

晉陽

北齊書

北齊書神武帝本紀曰魏武定三年春正月於并州置

晉陽宮

後主本紀曰天統三年冬十一月晉陽大明殿成

帝於晉陽起十三院壯麗逾於鄴下鑿晉陽四山爲大

佛像一夜燃油萬盆光照宮內

馮子琮傳曰世祖在晉陽既居舊殿少帝未有別所詔
子琮監造大明宮宮成世祖親自巡幸怪其不甚宏麗

子琮對曰至尊幼年纂成大業欲令敦行節儉以示萬
邦兼此北連天關不宜過復崇峻世祖稱善

後周武帝本紀曰建德六年夏五月戊戌詔曰京師宮

殿已從撤毀并鄴三所奢華過度誠復作之非我豈容
因而弗革諸堂殿壯麗並宜除蕩費宇諸物分賜窮民
三農之際別漸營構止蔽風雨務在卑狹
冬十二月戊辰廢并州宮及六府

晉隋

隋書煬帝本紀曰大業三年秋八月壬寅詔營晉陽宮
地理志曰太原縣有晉陽宮

唐

唐書元宗本紀曰開元五年冬十一月詔曰經邦創制

建國設險必因時順天統物立極我國家以神武聖德

應天受命龍躍晉水鳳翔太原建萬代之模為億兆之

主猶成湯之居亳有周之興岐朕以眇身纂承昌運守

祖宗之大寶恢中興之洪業叶時卜狩始經此都事本

因心情兼惟舊昔堯理唐郊武建丹陵之地漢居雒邑

更表南陽之都今王業所興宮觀猶在列於編郡情所

未安非所以恢大聖之鴻規展孝思之誠敬其并州宜

置北都改州為太原府刺史為尹司馬為少尹太原晉

陽為赤縣諸縣為畿縣秩視京洛兩府

馬燧傳曰燧引軍置太原燧以晉陽王業所起度都城東面平易受敵乃引晉水架汾而注城之東瀦以為池計寇至省守陴者萬人又決汾水環城多為池沼樹柳以固隄

太原

文宣帝紀曰天保二年冬十月戊申起宣光建始嘉福仁壽諸殿

唐書地理志曰北都天授元年置會要長壽元年九月

七日置改并州為太原神龍元年罷二月開元十三年

復置十月二天寶元年曰北京十月二上元二年罷九月

二十肅宗元年去年號其年四月改元寶應復為北都

晉陽宮在都之西北宮城周二千五百二十步崇四丈

八尺都城在汾右晉潛邱在中長四千三百二十一步

廣三千一百二十二步周萬五千一百五十三步其崇

四丈汾東曰東城貞觀十一年長史李勣築兩城之間

有中城武后時築以合東城宮南有大明城故宮城也

宮城東有起義堂倉城中有受瑞壇唐初高祖使子元

吉留守獲瑞石曰李淵萬吉築壇祀以少牢

太原府太原郡本并州開元十一年為府

晉陽縣有號令堂高祖誓義師於此西北十五里有講

武臺飛閣顯慶五年築

舊唐書崔神慶傳曰則天時擢拜并州長史先是并州

有東西二城隔汾水神慶始築城相接每歲省防禦兵數千人邊州甚以為便

五代史職方考曰并州後唐州建北都其軍仍曰河東册府元龜曰後唐莊宗同光元年夏四月以太原為西京

冬十一月改太原為北都

晉高祖天福二年冬十一月以北京潛龍宅為興義宮

大名

五代史職方考曰魏州唐故曰大名府置天雄軍五代皆因之後唐建鄴都晉漢因之至周罷大名府後唐曰興唐晉曰廣晉漢周復曰大名

册府元龜曰後唐莊宗同光元年夏四月即位於魏州是月升魏州為東京改元城縣曰興唐貴鄉縣曰廣晉都督府曰興唐府

三年春三月詔改東京為鄴都興唐府與北京太原府並為次府

晉高祖天福元年冬十二月改興唐府為廣晉府

六年秋八月壬子改鄴都皇城南門應天門為乾明門

大明館為都驛亭

七年夏四月乙丑敕改鄴都羅城及大城諸門羅城南墉門為廣運門觀音門為金明門橙槽門為清景門冠氏門為永芳門朝城門為景風門大城南門為昭明門

觀德門爲廣義門北河門爲靖安門魏縣門爲膺福門尉氏門爲迎春門朝城門爲興仁門上斗門爲延清門下斗門爲通遠門漢高祖乾祐元年春三月改廣晉爲大名府出帝開運二年夏四月己丑復以鄴都爲天雄軍後周高祖顯德元年春正月戊寅廢鄴都仍爲天雄軍宋史地理志曰慶厯二年建大名府爲北京宮城周三里一百九十八步卽真宗駐蹕行宮城南三門中曰順豫東曰省風西曰展義東一門曰東安西一門曰西安順豫門內東西各一門曰左右保成次北班瑞殿之前東西門二東曰凝祥西曰麗澤殿東西時巡殿門次北

時巡殿次言方殿次慶甯殿時巡殿前東西門二東曰景清西曰景和京城周四十八里二百六步門一十七熙甯九年改正南南河門曰景風東曰亨嘉鼓角曰阜昌正北北河門曰安平北博曰輝德正東冠氏門曰華景冠氏第二重曰春祺子城東曰泰康正西魏縣門曰寶成魏縣第二重曰利和子城西曰宣澤東南朝城門曰安流朝城第二重曰選齊西南觀音門曰安正觀音第二重曰靜方上水關曰善利下水關曰永濟內城創置北門曰靖武元豐七年廢善利永濟關王應麟曰慶厯二年五月戊午升大名府爲北京詔曰席萬盈之懿兆冠千里之上腴隱然北門壯我中夏

輿地廣記言左傳晉陽畢萬魏卜偃曰魏大名也其地於今魏為河中之永樂非元城之魏也漢以大名名此失矣今按舊唐書曰悅稱魏王以魏州為大名府其失始此

正月初六日夜三鼓校畢

光緒歲在著雍困敦春月吳縣朱記榮槐廬家塾校刊
歷代帝王宅京記卷十五終

歷代帝王宅京記卷十六

槐廬叢書

崑山顧炎武著

吳縣朱記榮校刊

開封

大梁

五代史職方考曰汴州唐故曰宣武軍梁以汴州為開封府建為東都後唐滅梁復為宣武軍晉天福三年升為東京漢周因之

後梁

冊府元龜曰太祖開平元年夏四月戊辰升汴州為開封府建東都是月制宮殿及都門名正殿為崇元殿東殿為元德殿內殿為金祥殿萬歲堂為萬歲殿門如殿

名大內正門爲元化門皇牆南門爲建國門滴漏門爲
啟運門下馬門爲升龍門元德殿前門爲崇明門正殿
東門爲金烏門西門爲玉兔門正衙東門爲崇禮門東
偏門爲銀臺門宴堂門爲德陽門天王門爲賓天門皇
牆東門爲寬仁門浚儀門爲厚載門皇牆西門爲神獸
門望京門爲金鳳門宋門爲觀化門尉氏門爲高明門
鄭門爲開明門梁門爲乾象門酸棗門爲興和門封邱
門爲含曜門曹門爲建陽門升開封浚儀爲赤縣尉氏
封邱雍邱陳留爲畿縣

五月改文思院爲乾文院同和院爲佐鸞院
二年秋七月甲午以高明門外繁臺爲講武臺是臺西

漢梁孝王常按歌闕樂於此當時因名曰吹臺其後有
繁氏居於其側里人乃以姓呼之時代綿寢雖官吏亦
從俗焉帝每登眺蒐乘訓戎宰臣以是奏而名之
三年春二月以滑州酸棗縣長垣縣鄭州中牟縣陽武
縣宋州襄邑縣曹州戴邑縣許州扶溝鄆陵縣陳州大
康等九縣割屬開封府仍升爲畿縣
秋七月改章善門爲左右銀臺門其左右銀臺門卻改
爲左右興善門冬十一月改乾文院爲文思院行從殿
爲興宅殿弓箭庫殿爲宣武殿毬場爲安毬場

冊府元龜曰後唐莊宗同光元年冬十二月壬申敕汴

州偽庭所立殿宇諸門竝去牌額復本名其宣武軍額
置於咸安門所在宮苑卽充行宮應有不合安鴟吻處
竝可去之

高祖天福三年夏五月丙辰以汴州行宮爲大甯宮

三年冬十月庚辰詔曰爲國之規在於敏政建都之法

務要利民恩放前經斷然通論願惟涼德獲啟丕基當

數朝戰伐之餘是兆庶傷殘之後車徒旣廣帑廩咸虛

經年之輓粟飛芻繼日而勞民動衆常煩漕運不給供

須今汴州水陸要衝山河形勢乃萬庾千箱之地是四

通八達之郊爰自按巡益觀宜便俾升都邑以利兵民

汴州宜升爲東京開封府仍升開封浚儀兩縣爲赤縣

餘升爲畿縣應舊制開封府時所管屬縣竝可仍舊割

屬收管亦升爲畿縣其雒京改爲西京雍京改爲晉昌

軍

丁亥詔改大甯宮門爲明德門又改京城諸門名南城

尉氏門以薰風爲名西二門鄭門梁門以金義乾明爲

名北二門酸棗封邱以元化宣陽爲名東二門曹門宋

門以迎春仁和爲名

四年春二月辛卯改東京玉華殿爲永福殿

三月己卯改明德殿爲滋德殿以宮城南門同名故也
五年秋九月戊子改東京上源驛爲都亭驛

正平後漢九千好東京土賦
高祖天福十二年六月戊辰詔曰浚都重地汴水名區
控襟帶於八方便梯航於萬國瞻言王氣允稱皇居其
汴州宜仍舊爲東京

太祖廣順元年夏六月以唐都長安時京城等門比定
令東京諸門薰風等爲京城門明德門爲皇城門啟運
等爲宮城門昇龍等爲宮門崇元等爲殿門

二年春正月詔開封府修補京師羅郭率府界丁夫五
萬五千版築旬日罷冬十月置宏文館史館集賢館
於厚載門內向東橫街東北

通鑑曰廣順三年帝欲祀南郊以自古以來郊祀常在
洛陽疑之執政曰天子所都則可以祀百神何必洛陽
於是始築圓邱社稷壇作太廟於大梁

世宗顯德二年夏四月乙卯詔曰惟王建國實曰京師
度地居民固有前則東京華夷臻湊水陸會通時向隆
平日增繁盛而都城因舊制度未恢諸衛軍營或多窄
陋百司公署無處興修加以坊市之中邸店有限工商
外至億兆無窮僦賃之資增添不定貧闕之戶供辦實
艱而又屋宇交連街衢湫隘入夏有暑溼之苦居常多
烟火之憂將便公私須廣都邑宜令所司於京城四面
別築羅城先立標幟候冬末春初農務閒時卽量差近

甸人夫漸次修築春作纔動便令放散如或土工未畢則迤邐次年修築所冀寬容辦集今後凡有營葬及興置宅竈并草市竝須去標幟七里外其標幟內候官中摩畫定街巷軍營倉場諸司公廨院務了卽任百姓營造

三年春正月戊戌發開封府曹滑鄭州之民十餘萬築大梁外城

三年夏六月癸亥詔曰輦轂之下謂之浩穰萬國駿奔四方繁會此地比爲藩翰近建京都人物誼闐閭巷隘陜雨雪則有泥濘之患風旱則多火燭之憂每遇炎蒸易生疫疾近者開廣都邑展引街坊雖然暫勞久成大

利朕昨自淮上迴及京師周覽康衢更思通濟千門萬戶庶諧安逸之心盛暑隆冬倍減寒溫之苦其京城內街道闊五十步者許兩邊人戶各於五步內取便種樹掘井修益涼棚其三十步以下至二十五步者各與三步其次有差

四年夏四月修永福殿

五年夏五月賜東京新城諸門名在寅曰寅賓門在辰曰延春門在巳曰朱明門在午曰景風門在未曰畏景門在申曰迎秋門在戌曰肅政門在亥曰元德門在子曰長景門在丑曰愛景門改大內東偏舊賓天門爲通苑門又以京城東新修驛爲懷信驛以待江南貢使焉

恭帝顯德六年冬十二月改萬歲殿為紫宸殿

宋京城

宋史地理志曰舊城周迴二十里一百五十五步東二

門北曰望春初名和政南曰麗景南三門中曰朱雀東曰保

康大中祥符五年創建西曰崇明西二門南曰宜秋北曰閭闔北

三門中曰景龍東曰安遠西曰天波以上宋初仍梁晉舊名至太平興國

四年改新城周迴五十里一百六十五步大中祥符九年

元年重修政和六年詔有司度國之南展築京城移置

官司軍營舊城周迴八里二百二十三步周顯德三

年築王應麟地理通釋曰東京開封府舊城唐建中

初李勉築本朝曰國南三門中曰南薰東曰宣化西曰安上

城亦曰外城東二門南曰朝陽北曰含輝太平興國四年改寅賓後復西二門南

曰順天北曰金輝北四門中曰通天天聖初改甯德後復東曰長

景次東曰永泰西曰安肅初號衛州門以上皆因周舊名至太平興國四年改今名

汴河上水門南曰大通太平興國四年賜名天聖初改順濟後復今名北曰宣

澤舊南北水門皆曰大通熙甯十年改汴河下南曰上善北曰通津天聖初改

廣津熙甯十年復惠民河上曰普濟下曰廣利廣濟河上曰咸

豐下曰善利舊名咸通上南門曰永順熙甯十年賜名其後又於金

輝門南置開遠門舊名通遠以上皆太平興國四年賜名

按城濠曰護龍河闊十餘丈天聖初教今名內外植柳粉牆朱戶禁人

往來城門皆甕城三層屈曲開門惟南薰新鄭新宋封

邱正門皆直門兩重以通御路金元以後多湮塞舊有

十三門南曰南薰陳州戴樓東曰新宋揚州新曹西曰

新鄭萬勝固子北曰陳橋封邱新酸棗衛州今道路所
通者惟曹鄭陳州揚州南薰固子封邱七門耳固或作
堀非也
宋朝會要曰自朱梁建都以汴州為東京皆因藩鎮舊
制但改名額而周顯德初始廣新城周迴四十八里二
百二十三步

趙德麟侯鯖錄曰舊城周迴二十里一百五十五步即
汴州城唐建中二年節度使李勉重築國初號曰闕城
亦曰裏城新城乃周世宗顯德二年四月詔別築新城
周迴四十八里二百二十三步號曰外城又曰羅城亦
曰新城元豐中裕陵命內侍宋用臣重築之
宋敏求東京記曰周世宗顯德二年四月詔京城四面

築羅城三年正月發京畿滑鄭曹之民命薛可言等督
之仍命韓通總其事王朴經度凡通衢委巷廣袤之間
皆朴定其制踰年而成神宗熙甯中始四面為敵樓作
甕城乃濬治濠塹

周密癸辛雜識曰汴之外城周世宗時所築宋神宗又
展拓之其高際天堅壯雄偉南關有太祖講武池周美
成汴都賦形容盡矣梁王鼓吹臺徽宗龍德宮舊址尙
在

岳珂程史曰開寶戊辰藝祖初修汴京大其城址曲而
宛如蚓曲焉耆老相傳趙中令鳩工奏圖初取方直四
面皆有門坊市經緯其間井井繩列上覽而怒自取筆

塗之命以幅紙作大圈紆曲縱斜旁註曰依此修築故城卽當時遺蹟也時人咸罔測多病其不宜於觀美熙甯乙卯神宗在位遂欲改作覽苑中收豚及內作坊之事卒不敢更第增牌而已及政和間蔡京擅國亟奏廣其規以便宮室苑囿之奉命宦侍董其役凡周旋數十里一撤而方之如矩墉堞樓櫓雖甚藻飾而蕩然無曩時之堅樸矣一時迄功第賞侈其事至以表記兩命詞科之題槩可想見其張皇也靖康胡馬南牧粘罕幹離不揚鞭城下有得色曰是易攻下令植砲四隅隨方而擊之城旣引直一砲所望一壁皆不可立意以此失守藝祖沉幾遠睹至是始驗宸筆所定圖宋承平時藏秘

閣今不存

和維愚見紀志曰汴之外城門名各有意義如云鄭門以其通往鄭州也如云酸棗門以其通往延津卽舊酸棗縣也其固子門未知其義近閱宣和遺事內載上清寶籙宮成浚濠水深二丈東則景龍門橋西則天波門橋二橋之下壘石爲固引舟相通兩橋人物往來不覺又都城沿革云西面門從南曰順天門俗名新門次曰利澤水門汴河自此入城次北曰開遠門又名萬勝門次北曰金輝門俗名固子門歐陽公歸田錄亦云飲於固子橋然則以壘石爲固而名其橋因以名其門也周禮掌固之職掌修城郭橋梁之固以爲固所依阻故曰

固或曰固作顧視也汴城卧牛之形北視黃河爲子而子不敢來害其母此臆度說無所據

今省城 國朝洪武初重築外包以磚門五東曰麗景南曰南薰西曰大梁北曰安遠東北曰仁和外建月城上各建樓其西舊名望京角樓四敵臺八十四窩鋪八十三東西南門甕城內皆有漢壽亭侯廟而北門甕城內則元帝廟也皆近時建

宋大內宮室

宋史地理志曰東京汴之開封也梁爲東都後唐罷晉復爲東京宋因周之舊爲都建隆三年廣皇城東北隅命有司畫洛陽宮殿之制按圖修之而皇居始壯麗矣

雍熙三年欲廣宮城詔殿前指揮使劉延翰等經度之

以居民多不欲徙遂罷宮城周迴五里南三門中曰乾

元宋初依梁晉之舊名曰明德太平興國三年改丹鳳

大中祥符八年改正陽明道二年改宣德雍熙元年

改今名節度使王彥威有詩刻石在其上後梁氏建國

其石在東曰左掖西曰右掖東西面門曰東華西華

寬仁神獸開寶三年改今名熙寧北一門曰拱宸

甯十年又改東華門北曰諤門西橫門曰左右升龍左右北門內各二門曰左右長慶

熙甯門改左右長慶左右銀臺東華門內一門曰左承

隔門曰左右嘉肅天祥符乾德六年賜名大中祥符元年正月天西華門

內一門曰右承天左承天門內道北門曰宣祐舊名光

祥符八年改大甯正南門內正殿曰大慶東西門曰左
 明道元年改今名右太和宋初曰日華月華大正衙殿曰文德宋初曰文
 年改今名熙甯開兩掖門曰東西上閣東西門曰左右
 改南門曰端禮嘉福宋初曰左右勤政明大慶殿舊名崇元乾德四年
 興國九年改韓元大中祥符入北有紫宸殿舊名崇德
 年改天安明道三年改今名改視朝之前殿也西有垂拱殿舊名長春明常日視朝
 之所也次西有皇儀殿開寶四年賜名滋福又次西有
 集英殿舊名廣政開寶三年曰大明淳化開曰含光大
 宴殿也殿後有需雲殿舊名玉華後改瓊東有昇平樓
 舊名紫雲明宮中觀宴之所也後宮有崇政殿舊名簡
 道元年改太平興國二年改今名熙閱事之所也殿後有景福
 甯間改北橫門曰通極

西有殿北向曰延和便坐殿也大中祥符七年建後苑
 名宣和門承明殿明道元年改端明二年改今名凡殿有門者皆隨殿名宮中
 又有延慶舊名萬歲大中安福觀文舊名集聖明道二
 年改清景慶雲玉京等殿壽甯堂舊名清淨明延春閣
 今名萬春寶福甯殿即延慶明東西有門曰左右昭慶觀
 文殿西門曰延真其東真君殿曰積慶前建感真閣又
 有龍圖閣下有資政崇和宣德述古四殿天章閣下有
 羣玉藥珠二殿後有寶文閣即壽昌閣慶閣東西有嘉
 德延康二殿前有景輝門後苑東門曰甯陽即宣和門
 改苑內有崇聖殿太清樓其西又有宜聖化成即玉宸
 元年改金華西涼清心等殿翔鸞儀鳳三閣華景翠芳瑤

津三亭延福宮有穆清殿延慶殿北有柔儀殿初有殿無名章

改寶慈景祐二年改今名崇徽殿北有欽明殿舊名天和

明道元年改觀文又改延福宮北有廣聖宮天聖二年建名長甯

景祐二年改今名延福宮北有廣聖宮天聖二年建名長甯

於後苑明道元年八月修文德殿成是夜禁中火延燒

命宰相呂夷簡為修葺大內使樞密副使楊崇勳副之

發京東西河北淮南江東西路工匠給役內出乘輿物

助其費以故改諸殿名又有慈德殿楊太后所居景

稼殿在後苑觀種稻延義閣在崇政殿內邈英閣在崇政殿

臣講讀之所也與延隆儒殿邈英閣後小殿皇慈壽殿

義同景祐三年賜名隆儒殿邈英閣後小殿皇慈壽殿

皇太后所居治慶壽宮保慈宮熙甯二年賜名玉華殿在後

平元年賜名治慶壽宮保慈宮熙甯二年賜名玉華殿在後

春殿熙甯元年建睿思殿八年建承極殿元豐三年建崇慶隆

祐二宮元祐元年建睿宮神宗所居東宮宣和殿在睿思殿

前起四年殿成其東側別有小殿曰疑芳其西曰瓊芳

年徽宗製後曰環碧元符三年廢崇甯初復作大觀三年

石實蔡京為之聖瑞宮皇太后所居顯謨閣建藏神宗

御集建中靖國元年玉虛殿元符初建玉華閣大觀初建

改日熙明尋復舊玉虛殿初建玉華閣大觀初建

親蠶宮政和元年燕甯殿在延福宮北奉安仁宗延福宮和

三年春新作於大內北拱辰門外舊宮在後苑之西南

今其地乃百司供應之所凡內酒坊裁造院油醋柴炭

鞍轡等庫悉移他處又遷兩僧寺兩軍營而作新宮焉

宋氏槐廬校刊

岡覆茅為亭修竹萬竿引流其下宮之右為佳閣曰
 宴春廣十有二丈舞臺四列山亭曰飛華橫度之四
 海為二亭架石梁以通湖梁之上又疏泉為湖中作
 奇縱數之二百六十有七尺又疏泉為湖中作
 接亭隄中作梁以通湖梁之上又疏泉為湖中作
 翠諸柵蹄尾動數千嘉花名木類聚區別幽勝苑若
 成西抵麗澤不類塵境初蔡京命童貫楊戩賈詳藍
 熙何訥等分任工役五人者因各為制度不務沿襲
 號延福五位東西配大內東北稍劣其東直景龍門
 抵天波門宮東西二橫門皆視禁門法所謂晨暉麗
 者也而晨暉門外入最深者後又跨舊城修築號延
 第六位跨城之外濠濠深者後又跨舊城修築號延
 波門橋二橋之景龍江有龍德宮初元符三年過景
 自通邱門不覺也景龍江有龍德宮初元符三年過景
 至封邱門不覺也景龍江有龍德宮初元符三年過景
 宅潛邸為之及作景龍江北有龍德宮初元符三年過景
 比對時中塗一壺春堂絕岸至龍德宮奇花珍木殿宇
 展拓盡都城一隅焉名曰擷芳園山水其地歲時次第
 樓觀參差猶良嶽延福保和殿政和三年美四月九
 也宮在舊城因附見此保和殿政和三年美四月九
 玉清神霄宮在福甯殿東七年改今名陽上清寶錄宮

政和五年作在景龍門東對景暉門又作仁濟輔正二
 亭於宮前作土施民符藥徽宗時登皇城下視之又開
 可勝計命道上作復道通寶錄宮以便齋醮之事徽宗數
 景龍門城上往來是年十二月始張燈於景龍門
 從復道上往來是年十二月始張燈於景龍門
 上下名曰預賞元宵其明年乃有期門之事
 萬歲山良嶽政和七年始於上清寶錄宮之東作萬歲
 介亭分東西二嶺直接南山之最高一峰九十里南則有
 館八仙館紫石巖樓真瞻覽秀軒龍吟堂山之南則有
 山兩峯茲時有雁池雍雍亭北直接龍絳霄樓山之西則有
 藥寮有西莊有巢雲亭有白龍泝濯龍峽蟠秀練光跨
 雲亭羅漢巖又有巢雲亭有白龍泝濯龍峽蟠秀練光跨
 閣閣下有平地鑿大沼嶺嶺畔有倚翠樓上為雁渚亭日
 浮湯西為梅渚亭日雪浪山有閣曰鳳池東出為雁渚亭日
 分二館東曰梅渚亭日雪浪山有閣曰鳳池東出為雁渚亭日
 池後有揮雪亭復由磴道至上介亭左復有日三秀東
 目日蕭森右復有亭日麗雲半介亭左復有日三秀東
 上流注山澗西行爲漱瓊軒又行石間為煉丹凝真觀
 園山亭下視江際飛岑高陽支流別為山莊為回溪又於
 菴躡雲臺蕭蕭間館飛岑高陽支流別為山莊為回溪又於
 南山之外為小山橫亘二里曰芙蓉城窮極巧而景

朱氏槐廬校刊

龍江外則諸館舍尤精其北又因瑤華宮火取其地作
 大池名曰曲江池中有堂曰蓬壺東盡封邱門而止其
 西則自天波門橋引水直西殆半里江乃折南又折北
 折南者過闔闔門為複道通茂德帝姬宅折北者四五
 里屬之龍德宮宣和四年徽宗自為長嶽宅折北者五
 國之良故宮良嶽蔡條謂初名鳳山後神記以詩為山
 良嶽排空霄峰又改名壽嶽蔡條謂南山成又改名壽
 嶽之正門名曰陽華故亦號陽華宮自政和訖靖康積
 累十餘年四方花竹奇石悉聚於斯樓臺亭館雖畧如
 前所記而月增日益殆不可以數計宣和五年朱勗於
 太湖取石高廣數丈載以大舟挽以千夫鑿河斷橋毀
 堰折插數月乃至賜號昭功敷慶神運石是年初得燕
 地故也圃緣此授節度使昭功敷慶神運石不肯已微宗
 晚歲患苑圍之衆國力不能支數有厭惡語由是得稍
 止及金人再至圍城日久欽宗命取山禽水鳥十餘萬
 盡投之汴河聽其所拆屋為薪鑿石為砲伐竹
 為筵籬又取大鹿數百千頭殺之以啗戰士云
 宋朝會要曰今大內即宣武軍節度使治所朱梁建都
 遂以衙署為建昌宮晉天福初又為大甯宮但改名號

而已周世宗雖加營繕猶未合古制建隆三年發開封
 浚儀民廣皇城四年五月太祖命有司畫洛陽宮殿按
 圖修之自是皇居始壯麗矣

趙德麟侯鯖錄曰唐東京宮城東西四里一百八十八
 步南北二里八十五步周迴十三里二百四十一步高
 四丈八尺宋東京宮城周迴五里

邵氏聞見錄曰東京唐汴州梁太祖因宣武軍置建昌
 宮晉改曰大甯宮周世宗雖加營繕猶未如王者之制
 藝祖得天下之初即遣使圖西京大內按以改作既成
 帝坐萬歲殿洞開諸門端直如繩嘆曰此如吾心小有
 私曲人皆見之矣

葉少蘊石林燕語曰京師大內梁氏建國止以爲建昌宮本唐宣武節度治所未暇增大也後唐莊宗遷洛復廢以爲宣武軍晉天福中因高祖臨幸更號大甯宮中新城是也其增展外羅蓋周世宗始爲之太祖建隆初以大內制度草創乃詔圖洛陽宮殿展皇城東北隅以鐵騎都尉李懷義與中貴人董役按圖營建初命懷義等凡諸門與殿須相望無得輒差故垂拱福甯柔儀清居四殿正重而左右掖與升龍銀臺等諸門皆然惟大慶殿與端門少差爾宮成太祖坐福甯寢殿令闢門前後召近臣入觀諭曰我心端直正如此有少偏曲處汝曹必見之矣羣臣皆再拜後雖嘗經火屢修率不敢易

其故處矣

按石林燕語與邵氏所記畧同

又曰大慶殿初名乾元太平興國祥符中皆因火改爲朝元天安景祐中方改今名有龍墀沙墀凡正至大朝會尊號則御焉郊祀大禮則駕宿於殿之後閣百官爲次宿於前之兩廊皇祐初始行明堂之禮又以爲明堂仁宗御篆明堂二字每行禮則旋揭之事已復去文德殿在大慶殿之西少次舊曰端明後改文明祥符中因火再建易今名紫宸殿在大慶殿之後少西其次又爲垂拱殿自大慶殿後紫宸垂拱之兩間有柱廊相通每日視朝則御文德所謂過殿也東西閣門皆在殿後之兩旁月朔不御過殿則御紫宸所謂入閣也月朔與誕

節郊廟禮成受賀契丹辭見亦皆御紫宸文德遇受册
發册明堂宣赦亦御而不常用宣麻不御殿而百官卽
庭下聽之紫宸不受賀而拜表稱賀則於東上閣門國
忌未赴景靈宮先進名奉慰則於西上閣門亦卽庭下
拜而授閣門使蓋以閣不以殿也惟垂拱爲日御朝之
所集英殿舊大明殿也明道中改今名每春秋大燕皆
在此太祖常御策制科舉人故後爲進士殿試之所其
東廊後有樓曰昇平舊紫雲樓也每大燕則宮中登而
視焉皇儀殿舊名滋福咸平太宗明德皇后居之以爲
萬安宮后崩復舊明道中改今名故常廢而不用以爲
治后喪之所

又曰東華門直北有東向門西與內直門相直俗謂之
謾門而無榜張衡東京賦所謂謾門曲榭者也薛綜註
謾曲屈斜行依城池爲道也集韻謾字或作籒以爲宮
室相連之稱今循東華門牆而轉東西爲北門亦可謂
斜行依牆矣凡宮禁之言相承必皆有自也按字訓謾
別也東京

賦但言
別門耳

周密癸辛雜識曰京師有八卦殿八門各有樹木山石
無一相類皆嵌石座亦穿空與石竅相通上欲有所往
與所幸美人自一門出宮人仙衣扶輪一聲霹靂則仙
樂競奏雲霄間石竅中腦麝烟起如霧

楊奐汴故宮記曰元太宗十一年己亥春三月按部至

元文類二隆
字並作龍

於汴汴長史宴於廢宮之長生殿懼後世無以考爲纂
其大概云皇城南外門曰南薰南薰之北新城門曰豐
宜橋曰龍津橋北曰丹鳳而其門三丹鳳北曰州橋橋
少北曰文武樓遵御路而北橫街也東曰太廟西曰郊
祀正北曰承天門而其門五雙闕前行東曰登聞檢院
西曰登聞鼓院檢院之東曰左掖門門之南曰待漏院
鼓院之西曰右掖門門之南曰都堂承天之北曰大慶
門而日精門左昇平門居其東月華門右昇平門居其
西正殿曰大慶殿東廡曰嘉福門西廡曰嘉瑞樓大慶
之後曰德儀殿德儀之東曰左升龍門西曰右升龍門
正門曰隆德曰蕭墻曰丹墀曰隆德殿隆德之左曰東

上閣門右曰西上閣門皆南嚮東西二樓鐘鼓之所在
鼓在東鐘在西隆德之次曰仁安門仁安殿東則內侍
局內侍之東曰近侍局近侍之東曰嚴祇門宮中則曰
撤合門少南曰東樓卽授除樓也西曰西樓仁安之次
曰純和殿正寢也純和西曰雪香亭雪香之北后妃位
也有樓樓西曰瓊香亭亭西曰涼位有樓樓北少西曰
玉清殿純和之次曰甯福殿甯福之後曰苑門由苑門
而北曰仁智殿有二大石左曰敷錫神運萬歲峰右曰
玉京獨秀太平巖殿曰山莊莊之西南曰翠微閣苑門
東曰仙韶院院北曰湧翠峰峰之洞曰大滌湧翠東連
長生殿殿東曰湧金殿湧金之東曰蓬萊殿長生西曰

浮玉殿浮玉之西曰瀛洲殿長生之南曰闕武殿闕武
南曰內藏庫由嚴祇門東曰尙食局尙食東曰宣徽院
宣徽北曰御藥院御藥北曰右藏庫右藏之東曰左藏
庫宣徽東曰點檢司點檢北曰秘書監秘書北曰學士
院學士之北曰諫院諫院之北曰武器署點檢之南曰
儀鸞局儀鸞之南曰尙輦局宣徽之南曰拱衛司拱衛
之南曰尙衣局尙衣之南曰繁禧門繁禧南曰安泰門
安泰西與左升龍門直東則壽聖宮兩宮太后位也本
明俊殿試進士之所北曰徽音殿徽音之北曰燕壽殿
燕壽殿垣後少西曰震肅衛司東曰中衛尉司儀鸞之
東曰小東華門更漏在焉中衛尉司東曰祇肅門祇肅

門東少南曰將軍司徽音壽聖之東曰太后苑苑之殿
曰慶春慶壽與燕壽竝小東華與正東華對東華門內
正北尙廐局尙廐西北曰臨武殿左掖門正北尙食局
局南曰宮苑司宮苑司西北曰尙醞局湯藥局侍儀司
少西曰符寶局器物局西則撒合門嘉瑞樓西曰三廟
正殿曰德昌東曰文昭殿西曰光興殿竝南嚮德昌之
後宣宗廟也宮西門曰西華與東華直其北門曰安貞
二大石外凡花石臺榭池亭之細竝不錄觀其制度簡
素比土階茅茨則過矣視漢之所謂千門萬戶珠璧華
麗之飾則無有也然後之人因其制度而損益之以求
其稱斯可矣

明洪武十一年卽宋故宮遺址建周王府乃太祖
第五皇子謚定始分封之國宗室繁衍甲於宅藩城
中井水苦鹹難飲汴人率於城外汲水飲之惟周府
太廟前汲水井水甘蓋宋大內舊井也

石林詩話曰京師職事官舊皆無公廨雖宰相執政亦
僦舍而居每遇出省或有中批外奏急速文字則省吏
徧持於私第呈押旣稽緩又多漏泄元豐初始建東京
西府於右掖門之前每府相對爲四位裕陵幸尙書省
駐輦環視久之時張侍郎文裕以詩慶宰執元參政厚
和之云黃閣勢連東鳳闕紫樞光直右銀臺蓋東府與
西闕相近西府正直右掖門

避暑錄話曰舊學士院在樞密院之後其南廡與樞密
後廊中分門乃西向玉堂本以待乘輿行幸非學士所
得常居惟禮上之日得略坐其東受院吏參謁而已其
得爲主廊北出直集英殿則所謂北門也學士僅有直
舍分於門之兩旁每鎖院受詔乃與中使坐主廊余爲
學士時始請闢兩直舍各分其一間與北門通爲三以
照壁限其中屏間命待詔鮑詢畫花竹於上與玉堂郭
熙春江晚景屏相配常時以爲美談後聞王丞相將明
爲承旨太上皇眷愛之厚乃旁取西省右正言廳以廣
之中爲殿曰右文則非復余前日所見矣

吳處厚青箱雜記曰梁祖都汴庶事草創正明中始於

周廬微道咸出其間衛士駟卒朝夕喧雜每受詔撰述皆移他所至太平興國中車駕臨幸顧左右曰若此卑陋何以待天下賢俊即日詔有司規度左昇龍門東北東府地爲三館命內臣督役晨夜兼作不日而成尋下詔賜名崇文苑以東廊爲昭文館書庫南廊爲集賢院書館西廊以經史子集四部爲史館庫凡四庫書籍正副本八萬卷斯亦盛矣

東京夢華錄曰東都外城方圓四十餘里城濠曰護龍河闊十丈濠之内外皆植楊柳粉牆朱戶禁人往來城門皆甕城三層屈曲開門惟南薰門新鄭門新宋門封

邱門皆直門兩重蓋此係四正門皆留御路故也新城南壁其門有三正南門曰南薰門城南一邊東南則陳州門傍有蔡河水門西南則戴樓門傍亦有蔡河水門蔡河正名惠民河爲通蔡州故也東城一邊其門有四東南曰東水門乃汴河下流水門也其門跨河有鐵裹廳門遇夜如牖垂下水面兩岸各有門通人行路出拐子城夾岸百餘丈次則曰新宋門次曰新曹門又次曰東北水門乃五丈河之水門也西城一邊其門又四從南曰新鄭門次曰西水門汴河上水門也次曰萬勝門又次曰固子門又次曰西北水門乃金水河水門也北城一邊其門有四從東曰陳橋門乃大遼使驛路次曰封邱門

北郊次曰新酸棗門次曰衛州門諸門名皆俗呼其正御路次曰新鄭門本應天門新城每百步設馬面戰棚密置女頭固子門本金耀門旦暮修整望之聳然城裏牙道各植榆柳成陰每二百步置一防城庫貯守禦之器有廣固兵士二十指揮每日修造泥飾專有京城所提總其事

舊京城方圓約二十里許南壁其門有三正南門曰朱雀門左曰保康門右曰新門東壁其門有三從南汴河南岸角門子河北岸曰舊宋門次曰舊曹門西壁其門有三從南曰舊鄭門次汴河北岸角門子次曰梁門北壁其門有三從東曰舊封邱門次曰景龍門乃大內城角寶籙宮前也次曰金水門

穿城河道有四南壁曰蔡河自陳蔡山西南戴樓門入

京城繚繞自東南陳州門出河上有橋十一自陳州門

裏曰觀橋在五岳觀後門從北次曰宣泰橋次曰雲騎橋次曰

橫橋子在彭婆宅前次曰高橋次曰西保康門橋次曰龍津

橋正對內前次曰新橋次曰太平橋高殿前宅後次曰糴麥橋次

曰第一座橋次曰宜男橋出戴樓門外曰四里橋中曰

汴河自西京洛口分水入京城東去至泗州入淮運東

南之糧凡東南方物至此入京城公私仰給焉自東水

門外七里至西水門外河上有橋十三從東水門外七

里曰虹橋其橋無柱皆以巨木虛架飾以丹雘宛如飛

虹其上下土橋亦如之次曰順城倉橋入水門裏曰便

橋次日曰下土橋次日曰上土橋投西角子門曰相國寺橋
 次日曰州橋正名大漢正對於大內御街其橋與相國寺橋皆
 低平不通舟船惟西河平船可過其柱皆青石為之石
 梁石筍循欄近橋兩岸皆石壁雕鏤海馬水獸飛雲之
 狀橋下密排石柱蓋車駕御路也州橋之北岸御路東
 西兩闕樓觀對聳橋之西有方淺船二隻頭置巨幹鐵
 槍數條岸上有鐵索三條遇夜絞上水面蓋所遺失舟
 船也西去曰浚儀橋次日曰興國寺橋亦名馬軍次日曰太
 師府橋蔡相宅前次日曰金梁橋次日曰西浮橋舊以船為之橋
 矣今皆用木石造次日曰西水門便橋門外曰橫橋東北曰五丈河來自
 濟鄆般挽京東路糧斛入京城自新曹門北入京河上

有橋五東去曰小橫橋次日曰廣備橋次日曰蔡氏橋次日曰
 青暉橋染院橋西北曰金水河自京城西南分京索河
 水築堤從汴河上用木槽架過從西北水門入京城夾
 牆遮擁入大內灌後苑池浦矣河上有橋三曰白虎橋
 橫橋五王宮橋之類又曹門河小子橋曰念佛橋
 大內正門宣德樓列五門門皆金釘朱漆壁皆磚石間
 甃鏤鏤龍鳳飛雲之狀莫非雕畫棟峻桷層椳覆以
 琉璃瓦曲尺朵樓朱欄彩檻下列兩闕亭相對悉用朱
 紅杈子入宣德樓正門乃大慶殿庭設兩樓如寺院鐘
 樓上有太史局保章正測驗刻漏逐時刻執牙牌奏每
 遇大禮車駕宿齋及正朔朝會於此殿殿外左右橫門

日左右長慶門內城南壁有門三座係大朝會趨朝路
宣德樓左曰左掖門右曰右掖門左掖門裏乃明堂右
掖門裏西去乃天章寶文等閣宮城至北廊約百餘丈
入門東去街北廊乃樞密院次中書省次都堂宰相朝
退治事
於此門下省次大慶殿外廊橫門北去百餘步又一橫
門每日宰執趨朝此處下馬餘侍從臺諫於第一橫門
下馬行至文德殿入第二橫門東都大慶殿東偏門西
廊中書門下後省次修國次院次南向小角門正對文
德殿常朝
殿也殿前東西大街東出東華門西出西華門近
裏又兩相門對左右嘉肅門也南去左右銀臺狀若東
華門裏太子宫入嘉肅門街南大慶殿後門東西上閣

門街北宣祐門南北大街西廊面東曰凝暉殿乃通會
通門入禁中矣殿相對東廊門樓乃殿中省六尙局御
廚殿上常列禁衛兩重時刻提警出入甚嚴近裏皆近
侍中貴殿之外皆知省御藥幕次快行親從官輦官車
子院黃院子內諸司兵上祇候宣喚曰宮禁買賣進貢
皆由此入宣祐門外西去紫宸殿正朔受
朝於此次曰文德殿
常朝所御次曰垂拱殿次曰皇儀殿次曰集英殿御宴及試
舉人於此
後殿曰崇政殿保和殿內書閣曰睿思殿後門曰拱辰
門

內諸司皆在禁中如學士院皇城司四方館客省東西
上閣門通進司內弓劍槍甲軍器等庫翰林司茶酒
局也內

侍省入內內侍省內藏庫奉宸庫景福殿庫延福宮殿
中省六尚局尚藥尚食尚輦尚醞尚舍尚衣諸閣分內香藥庫後苑作
翰林書藝局醫官局天章等閣明堂班朔布政府

外諸司左右金吾街仗司法酒庫內酒坊牛羊司乳酪
院儀鸞司帳設局也車輅院供奉庫雜物庫雜賣務東西作

坊萬全造軍器所修內司文思院上下界綾錦院文繡院軍

器所上下竹木務箔場車營致遠務驛務馳坊象院作

坊物料庫東西密務內外物庫油醋庫京城守具所鞍

轡庫養馬日左右騏驥院天駟十監河南北十炭場四

熱藥局內外柴炭庫軍頭引見司架子營樓店務權貨

務都茶場大宗正司左藏大觀元豐宣和等庫編估司

打套所諸米麥等自州東虹橋元豐倉順成倉東水門
裏廣濟裏河折中外河折中富國廣盈萬盈永豐濟遠
等倉陳州門裏麥倉子州北夷門山五丈河諸倉約共
有五十餘所日有支納下卸即有下卸指軍兵士支遣
即有袋家每人肩兩石布袋遇有支遣倉前成市近新
城有草場二十餘所每遇冬月諸鄉納粟稈草牛車闌
塞道路車尾相啣數十萬輛不絕場內堆積如山諸軍
打請營在州北即德州南倉不許僱人般擔竝要親自
負米此祖宗之法也

坊巷御街自宣德樓一直南去約闊二百餘步兩邊乃
御廊舊許市人買賣於其間自政和間官司禁止各安

鈔本無金史一條

立黑漆杈子路心又安朱漆杈子兩行中心道不得人馬行往行人皆在廊下朱杈子之外杈子裏有磚石甃砌御溝水兩道宣和間盡植蓮荷近岸植桃李梨杏雜花相間春夏之用望之如繡

宣德樓前左南廊對左掖門爲明堂頡頏布政府秘書省右南廊對右掖門近東則兩府八位西則尙書省御街大內前南去左則景靈東宮右則西宮近南大晟府次日太常寺州橋曲轉大街面南曰左藏庫

金史曰南京路國初曰汴京貞元元年更號南京都城十四門曰開陽曰宣仁曰安利曰平化曰通遠曰宣照曰利川曰崇德曰迎秋曰廣澤曰順義曰迎朔曰順

常曰廣智宮城門南外門曰南薰南薰北新城門曰豐宜橋曰龍津橋北門曰丹鳳其門三丹鳳北曰丹橋橋少北曰文武樓遵御路而北橫街也東曰太廟西曰郊社正北曰承天門其門五雙闕前引東曰登聞檢院西曰登聞鼓院檢院東曰左掖門門南曰待漏院鼓院西曰右掖門門南曰都堂直承天門北曰大慶門門東曰日精門又東曰左昇平門大慶門西曰日華門右西曰右昇平門正殿曰大慶殿殿前有龍墀又南有丹墀東廡曰嘉福樓西廡曰嘉瑞樓大慶後曰德儀殿東曰左昇龍門西曰右昇龍門正門曰隆德內有隆德殿有蕭牆有丹墀隆德殿左曰東上閣門右曰西上閣門皆

南向鼓樓在東鐘樓在西隆德之次日仁安門仁安殿
東則內侍局又東曰近侍局又東則嚴祗門宮中則稱
曰撤合門少南曰東樓則授除樓也西曰西樓仁安之
次日純和殿正寢也純和西曰雪香亭亭北則后妃位
也有樓樓西曰瓊香亭亭西曰涼位有樓樓北少西曰
玉清殿仁和之次日福甯殿殿後曰苑門內曰仁智殿
有二太湖石左曰敷錫神運萬歲峰右曰玉京獨秀太
平巖殿曰山莊其西南曰翠微苑門東曰仙韶院院北
曰翠峰峰之洞曰大滌翠湧東連長生殿又東曰湧金
殿又東曰蓬萊殿長生西曰浮玉殿又西曰瀛洲殿東
生殿南曰閱武殿又南曰內藏庫嚴祗門東曰尙食局

又東曰宣徽院院北曰御藥院又北右藏庫東則左藏
庫宣徽院東曰點檢司司北曰秘書監又北曰學士院
又北曰諫院又北曰武器署點檢司南曰儀鸞局又南
曰尙輦局宣徽院南曰拱衛司又南曰尙衣局其南爲
繁禧門又南曰安泰門門與左昇龍門相直東壽聖宮
兩宮太后位也本明俊殿試進士之所宮北曰徽音院
又北曰燕壽殿殿垣後少西曰振肅衛司東曰中衛尉
司儀鸞局東曰小東華門更漏在焉中衛尉司東曰祗
肅門少東南曰將軍司徽音壽聖東曰太后苑殿曰慶
春與燕壽殿竝小東華門與正東華門對東華門內正北
尙廐局其西北曰臨武殿左掖門北尙食局南曰宮苑

司其西北尙醞局湯藥局侍儀司少西曰符寶局器物局又西則撤合門也嘉瑞樓西曰三廟正殿曰德昌東曰文昭西曰光興德昌後宣宗廟也宮西門曰西華與東華相直北門曰安貞

大金國志曰貞元三年國主陰有南征之志乃謀遷都汴京先遣參知政事馮長甯爲留守經畫修內未幾天火焚之宮室皆盡主大怒免長甯爲庶人尋杖之死正隆元年冬復修汴京大內遣左丞相領行臺尙書省督其事以梁漢臣爲提舉官號大使詔曰朕祇奉上元君臨萬國屬從朔地爰出幽都猶跼脊於一隅非光宅於中土顧理道所在有因有循權變所生有革有化大

梁天下之都會陰陽之正中朕惟變通之數其可違乎往歲卜宅相土宜建新都將命不虔燼於一炬第山川秀麗卉物繁滋朕夙有志焉雖則劬勞其究安宅其大內規模一仍舊貫可大新營構乘時葺理

汴京制度宣宗所遷大槩依宋之舊故宮宮墻四角皆有樓高五丈每樓一所兩旁各有屋以裹牆角自左掖門向西三十步橫入一門號左昇龍門入長門卽大慶門外游峻廊上俯闕通市正望丹鳳樓後下樓卽右昇龍門此兩門通左右掖門橫通大慶門外其門有三中曰大慶東曰日精西曰月華門旁皆列戟入此門望見大慶殿殿前有兩樓對峙東曰嘉福西曰嘉瑞大慶殿

屋十一間龍墀二級旁朵殿各三門峻廊後與兩廡相接殿壁畫四龍各長數丈乃宣宗渡河後畫中有御畫小龍用拱斗鬪成一方井如佛正殿蓋中有一金龍以絲網罩之此正衙也轉西御屏下峻階數步一殿曰德儀殿有三門中日隆平左曰左隆平右曰右隆平入此門東西兩井望見隆德殿卽宋垂拱殿也殿庭中東一鐘樓西一鼓樓殿屋五大間旁各殿三間階上龍墀一級東西兩閣門竝樓屋下有門通往來此常朝殿也此殿後又一庭院有門曰仁安東西兩門東出東華門入仁安門望見仁安殿龍墀兩廊皆入仁德殿規模卽宋集英殿也自此後兩殿有門皆有船軒連接兩邊廊屋

止是墨漆廳戶意謂必宮人居於此乃內殿百官不到前四殿皆琉璃筒瓦一殿曰德和一殿曰福甯後有一小殿殿後有直舍此殿後卽內宮牆門有門兩重出入後苑十數步間過一小徑橋有仁智殿溪中有龍舟仁智殿下兩巨石高三丈廣半之東一石有小碑刻敕賜昭度神運萬歲峰西一石刻獨秀太平巖乃宋徽宗御書刻石填金殿後有石壘成山高百尺廣倍之最上刻石曰香石泉山山後挽水上山水自流下至荆玉澗又流至湧翠峰下有太山洞水自洞門飛下復由本路出德和殿迤邐至大慶門外橫德右昇龍門出後朝門榜曰啟慶之宮入宮門後有三門中日德昌左曰文階右

日光興制度宏麗金碧輝映不可勝言出啟慶門復入
右昇龍門過大慶門外出左昇龍門向東行一門向南
榜曰聖壽宮左安泰門右明昌門卽金國太后宮入宮
門直入一門榜曰徽音又一門榜曰光熙望見徽音殿
長樂殿入光熙門繁禧門有德壽殿復出此宮卽秘閣
在左掖門之西五門之東卽古待漏院自五門望南向
丹鳳門中間禁路兩廊千步廊盡處向東一屏牆向南
一大門卽太廟門內三門門上竝畫蟠龍殿宇二十五
間高大宏麗兩旁修廊東西各開一門與廊相通蓋百
官陪位入此兩門甚便殿上十一室盡榜金國祖宗諡
號每一室計三門東邊一門西邊一牕嵌一小石室上

下有石廣三尺石門一有閣可開閉係藏神主處遇祭祀
迎神主出石室祭畢復藏殿宇出太廟向西行向南一
門卽社壇周圍皆牆外四門遇祭則開迎四方之氣宮
室制度金國時有改更大抵皆宋朝之舊也

壬申人日飲於惠文女兒南花樓園小樓中酒後
行選官格二局乘暇得校完此卷藏園記

光緒歲在著雍困敦春月吳縣朱記榮槐廬家塾校刊
歷代帝王宅京記卷十六終

程